



Broj: 01-14-2-3800/14
Sarajevo, 29.12.2015.godine

Na osnovu člana 61. stav (2) Zakona o upravi („Službeni glasnik BiH“, br. 32/02 i 102/09), a u vezi sa članom 3. Memoranduma o razumjevanju za realizaciju državne strategije za rad na predmetima ratnih zločina od 15.04.2014. godine, potpisanog između Delegacije Evropske unije i Ministarstva pravde Bosne i Hercegovine, ministar pravde Bosne i Hercegovine donosi

ODLUKU
O POSTUPKU I NAČINU IZBORA TE USLOVIMA I NAČINU
OBAVLJANJA POSLOVA DODATNOG OSOBLJA U MINISTARSTVU
PRAVDE BOSNE I HERCEGOVINE

Član 1

Ovom Odlukom utvrđuju se postupak i način izbora, te uslovi i način obavljanja poslova dodatnog osoblja Ministarstva pravde Bosne i Hercegovine u skladu sa Memorandumom o razumjevanju potpisanim između Delegacije Evropske unije i Ministarstva pravde Bosne i Hercegovine (u daljem tekstu: Memorandum).

Član 2

Ministarstvo pravde Bosne i Hercegovine će, u skladu sa obavezama preuzetim Memorandumom, privremeno angažovati četiri stažista i jednog stručnog savjetnika u Odsjek krivične odbrane Ministarstva pravde Bosne i Hercegovine i Odsjek za edukaciju u kaznenim stvarima pred Sudom BiH, po osnovu ugovora o djelu, u periodu do isteka važnosti Memoranduma.

Član 3

Finansijska sredstva za zapošljavanje i rad osoblja iz člana 2. Odluke obezbjediće se u okviru budžetske podrške Evropske unije na način utvrđen Memorandumom.

Član 4

- (1) Osoblje iz člana 2. Odluke mora zadovoljavati sljedeće uvjete:
- a) da su državljani Bosne i Hercegovine,
 - b) da su stariji od 18 godina,
 - c) da su zdravstveno sposobni,
 - d) da se protiv njih ne vodi krivični postupak i
 - e) da nisu obuhvaćeni odredbom člana IX.1 Ustava Bosne i Hercegovine,
- (2) Stručni savjetnik mora, pored uslova iz stava (1) ovog člana, ispunjavati i sljedeće uvjete:
- a) završen pravni fakultet – diploma o završenom VII stepenu ili diploma po Bolonjskom sistemu studiranja o stečenih najmanje 240 ECTS bodova,
 - b) najmanje tri godine radnog iskustva u struci,
 - c) znanje rada na računaru,
 - d) aktivno poznavanje engleskog jezika,

- e) dobro poznavanje krivičnog zakona i krivičnog postupka u BiH, međunarodnog humanitarnog prava, Evropske konvencije o ljudskim pravima i drugih međunarodnih instrumenata za zaštitu ljudskih prava i njihovog tumačenja, kao i relevantne domaće i međunarodne sudske prakse.
- (3) Stažist mora pored uslova iz stava (1) ovog člana, ispunjavati i sljedeće uslove
- a) Završen pravni fakultet – diploma o završenom VII stepenu ili završen drugi ciklus školovanja po Bolonjskom sistemu obrazovanja),
 - b) da nije ostvarena ukupno godina dana radnog iskustva u struci,
 - c) znanje rada na računaru,
 - d) aktivno poznavanje engleskog jezika.

Član 5.

(1) Ispunjenost uvjeta savjetnik iz člana 4. stav (2) dokazuje dostavljanjem:

- ovjerene kopije lične karte;
- izjave da nije obuhvaćen odredbom člana IX.1 Ustava Bosne i Hercegovine ovjerenom od strane nadležnog organa;
- ovjerene kopije diplome odnosno svjedočanstvo o završenoj visokoj školskoj spremi. Uz diplomu stečenu van Bosne i Hercegovine nakon 06.04.1992 godine potrebno je priložiti dokaz o nostrifikaciji iste.
- dokaz o završenom pripravničkom stažu, odnosno o radnom iskustvu u struci – dokazuje se uvjerenjem odnosno potvrdom koju izdaje poslodavac kod kojeg je kandidat ostvario potrebno radno iskustvo. Ukoliko kandidat dostavi kopiju radne knjižice, moraju biti kopirane i ovjerene strane od 1. do 7. a uz tu kopiju moraju dostaviti potvrdu izdatu od Fonda Penzijsko-mirovinskog osiguranja o vrsti zanimanja i školskoj spremi sa kojom je ostvareno radno iskustvo ukoliko postoji bilo kakvo iskustvo upisano u radnu knjižicu;
- uvjerenje o poznavanju rada na računaru;

(2) Ispunjenost uvjeta stažist iz člana 4. stav (3) dokazuje dostavljanjem:

- ovjerene kopije lične karte;
- izjave da nije obuhvaćen odredbom člana IX.1 Ustava Bosne i Hercegovine ovjerenom od strane nadležnog organa;
- ovjerene kopije diplome odnosno svjedočanstvo o završenoj visokoj školskoj spremi. Uz diplomu stečenu van Bosne i Hercegovine nakon 06.04.1992 godine potrebno je priložiti dokaz o nostrifikaciji iste;
- ukoliko je datum sticanja visoke školske spreme stariji od jedne (1) godine, kandidati su dužni dostaviti dokaz da nemaju ostvaren radni staž nakon sticanja visoke stručne spreme u trajanju od jedne (1) godine dana, ili više (potvrda/uvjerenje Zavoda za zapošljavanje ili ovjerena kopija radne knjižice, uključujući strane na kojima se upisuju podaci o zaposlenju);
- uvjerenje o poznavanju rada na računaru;

(3) Kandidat kojem se ponudi zaključenje ugovora o djelu dužan je u ostavljenom roku koji ne može biti kraći do 10 dana dostaviti uvjerenje da je zdravstveno sposoban izvršiti djelo za koje se ugovor zaključuje i uvjerenje da se protiv njega ne vodi krivični postupak.

Član 6.

Pravni savjetnik se angažuje radi pružanja pravne i tehničke potpore odvjetnicima koji zastupaju pred Odjelom I i Odjelom II Suda BiH u cilju rješavanja zahtjeva za pravnom

podrškom pred Sudom BiH, uključujući analiziranje sudske prakse relevantnih međunarodnih sudova, kao i pružanje ostalih vidova pravne potpore braniteljima, a u okviru mandata Odsjeka kaznene odbrane, sudjeluje u razvijanju i kontinuiranom unaprjeđivanju programa edukacije za branitelje, koordinira organizaciju i realizaciju seminara, obuka kao i drugih edukativnih programa na teme iz oblasti međunarodnog kaznenog prava, kaznenog prava, vještina zastupanja i ostalih relevantnih tema po nalogu šefa Odsjeka za edukaciju u kaznenim stvarima pred Sudom BiH, ostvaruje vezu sa Međunarodnim kaznenim sudom za bivšu Jugoslaviju u cilju koordinacije i unaprjeđenja suradnje između Suda i branitelja, te obavlja i druge poslove neophodne za postizanje ciljeva iz potpisanog memoranduma a po nalogu šefa Odsjeka za kaznenu obranu i šefa Odsjeka za edukaciju u kaznenim stvarima pred Sudom BiH, kojima podnosi izvješće o svome radu.

Član 7.

Stażist se angažira da pod nadzorom i instrukcijama stručnog savjetnika i šefa Odsjeka kaznene odbrane sudjeluju u pružanju pravne i tehničke potpore odvjetnicima koji zastupaju pred Sudom BiH u smislu praćenja i prikupljanja stručne literature, pravnih stavova i shvatanja, analiza domaćeg krivičnog zakonodavstva i druge domaće propise koje šef Odsjeka kaznene odbrane smatra nužnim, kao i propisa iz oblasti međunarodnog prava, te sudske prakse relevantnih međunarodnih sudova temeljem čega sačinjavaju statističke pokazatelje, te pripremaju izvještaje. Pomažu u razvijanju i kontinuiranom unaprjeđivanju programa edukacije za branitelje, logistički pomažu prilikom organizacije seminara i drugih vidova edukacije (organiziranje smještaja za predavače, avio karte, sale, vode evidencije o polaznicima obuka i održanim obukama. Prema instrukcijama stručnog savjetnika i šefa Odsjeka kaznene odbrane, pretražuje dostupne baze podataka Međunarodnog kaznenog suda za bivšu Jugoslaviju i obavlja pripremne radnje za ovjeru istih, te obavlja i sve druge poslove neophodne za postizanje ciljeva iz potpisanog memoranduma a po nalogu šefa Odsjeka za kaznenu obranu i šefa Odsjeka za edukaciju u kaznenim stvarima pred Sudom BiH, kojima podnosi izvješće o svome radu.

Član 8.

- (1) Za obavljene posao, angažirano osoblje iz člana 2. ove Odluke imaju pravo na mjesečnu naknadu u neto iznosu koji će biti preciziran ugovorom o djelu.
- (2) Djelo koje je predmet ove Odluke u članu 6. i članu 7. obavljat će se svaki radni dan u minimalnom trajanju od 6 sati a po potrebi i neradnim danima i u vrijeme praznika po nalogu šefa Odsjeka krivične odbrane i šefa Odsjeka za edukaciju u kaznenim stvarima pred Sudom BiH.
- (3) U ugovoru o djelu će biti ostavljena mogućnost da angažirano osoblje u dogovoru sa šefom Odsjeka krivične odbrane i šefom Odsjeka za edukaciju u kaznenim stvarima pred Sudom BiH najviše pet dana za vrijeme trajanja ugovora ne obavi posao kako je to propisano stavom (2) ovog člana.

Član 9.

- (1) Ministarstvo pravde BiH objavljuje Javni poziv na dostavljanje ponuda kandidata koji su zainteresirani za angažman po ugovoru o djelu u Ministarstvu pravde BiH.

- (2) Javni poziv će sadržavati uvjete potrebne za obavljanje poslova te potrebnu dokumentaciju, mjesto dostavljanja ponuda, te rok u kojem je javni poziv otvoren.
- (3) Javni poziv će biti otvoren 10 dana od dana objave u tri visokotiražna dnevna lista od kojih se svaki distribuira na teritoriju svakog entiteta i na cijelom teritoriju BiH.
- (4) Javni poziv se objavljuje i na službenoj Internet stranici Ministarstva pravde BiH, najmanje 7 dana prije završetka roka za dostavljanje prijave.

Član 10.

- (1) Ministar pravde imenuje Komisiju za izbor koja se sastoji od 3 člana zaposlena u Ministarstvu pravde, renomiranih i uglednih pravnika.
- (2) Komisija iz stava (1) ovog člana ima zadatak pregledati pristigle prijave, te kandidate koji su dostavili uredne prijave, pozvati na pismeno testiranje i usmeno razgovarati sa kandidatima, te rang listu uspješnih kandidat sa ostvarenim bodovima dostaviti ministru pravde.
- (3) Komisija za izbor sačinjava pisani izvještaj u kom obrazlaže rezultat procesa izbora.

Član 11.

- (1) Svaki kandidat je dužan naznačiti privatnu e-mail adresu, putem koje će Komisija za izbor komunicirati sa istim.
- (2) O obavezi iz stava (1) ovog člana Ministarstvo pravde BiH je dužno naznačiti na vidljivom mjesto u javnom pozivu sa naznakom da će kandidat koji ne dostavi e-mail automatski biti isključen iz daljnje procedure po javnom pozivu.

Član 12.

- (1) Komisija će obezbjediti puna prava učešća u procesu angažiranja jednom ili više predstavnika Organizacije za evropsku bezbjednost i saradnju u svojstvu posmatrača bez prava glasa.
- (2) Posmatrač ima pravo biti uključen u sve faze procesa iz stava 1. ovog člana i dostavljaju mu se fotokopije svih relevantnih materijala.

Član 13.

- (1) Pismeno testiranje će biti na engleskom jeziku i održaće se dan prije usmenog intervjua.
- (2) Pismeno testiranje iz stava (1) ovog člana za stručnog savjetnika sastoji se od 10 stručnih opcionih pitanja i dva esejska.
- (3) Pitanja pismenog testa za stručnog savjetnika će biti koncipirana na način da će na osnovu rezultata testa Komisija steći uvid u stepen poznavanja krivičnog zakona i krivičnog postupka u BiH, međunarodnog humanitarnog prava, Evropske konvencije o ljudskim pravima i drugih međunarodnih instrumenata za zaštitu ljudskih prava i njihovog tumačenja, kao i relevantne domaće i međunarodne sudske prakse.
- (4) Pismeno testiranje iz stava (1) ovog člana za stažistu sastoji se od pisma motivacije i esejskog pitanja temeljem kojeg će članovi komisije steći uvid u sposobnosti kandidata za rad na unaprijedenu rada na predmetima ratnih zločina.

- (5) Usmeni intervju se sastoji od kratkog predstavljanja kandidata, razloga zbog kojih se prijavio na navedenu poziciju i razloga zbog kojih bi trebao biti izabran, te stručnih pitanja koje postavljaju članovi Komisije,

Član 14.

- (1) Obvezno je testiranje znanja engleskog jezika kandidata i na usmenom dijelu ispita.
- (2) Prilikom utvrđivanja rang liste za osoblje, 70% ukupnih bodova će biti uspjeh ostvaren na pismenom testiranju, a 30% bodova će biti rezultati usmenog testiranja i rezultati ostvareni iz poznavanja engleskog jezika.
- (3) Komisija će angažovati stručnjaka za engleski jezik koji će ocijeniti radove sa aspekta znanja pisanja i čitanja engleskog jezika, i njegova ocjena čini 30 % ukupne ocjene na usmenom testiranju.

Član 15.

- (1) Komisija će sačiniti rang listu na osnovu rezultata pismenog testiranja i intervjua i dostaviti je ministru.
- (2) Uz svakog kandidata Komisija će sačiniti kratku napomenu o općem utisku kandidata.
- (3) Ministar će zaključiti ugovor o djelu sa kandidatima sa liste koje on odabere vodeći se postignutim uspjehom i napomenom Komisije.
- (4) Ukoliko u periodu do isteka trajanja Memoranduma dođe do raskida ugovora o djelu sa izabranim kandidatima, ministar može, bez provođenja novog konkursa, zaključiti ugovor o djelu sa kandidatom koji je slijedeći na rang listi.

Član 16.

Svaki kandidat koji smatra da mu je povrijeđeno neko pravo u procesu angažmana dodatnog osoblja, ima pravo žalbe ministru pravde BiH, u roku od 10 dana od dana prijema e-maila o odabiru najuspješnijeg kandidata.

Član 17.

Zadužuje se Odsjek za opće i kadrovske poslove da raspiše javni poziv za angažovanje osoblja iz člana 2. Odluke, po proceduri koju utvrdi ministar pravde.

Član 18.

Ova odluka stupa na snagu danom donošenja i objavljuje se na službenoj Internet stranici Ministarstva pravde BiH.

MINISTAR
Josip Grubeša

Dostaviti:

- Sektoru za kadrovske, opće i finansijsko - materijalne poslove;
- a/a.